

Rapport annual 2023 Biblioteca popolare Disentis/Mustér e contuorn

Tenor la statistica digl onn 2023 ha la biblioteca popolare e contuorn empristau 10'234 medias a 992 utilisaders activs (incl. las classes da scola). Alla clientella stattan 11'695 medias (cudischs, DCs, DVDs e figuras da Tonie) a disposiziun.

L' incumbensa dalla biblioteca ei buca mo d' empristar ora cudischs, mobein ella duei era esser in liug da sentupada e da brat cultural. L'esperienza ha mussau che nossa clientella appreziescha cunzun auturs e temas regionalis. Aschia ha il team dalla biblioteca envidau ils 18 da schaner 2023 ad ina sentupada cun Flavio Huonder. Flavio Huonder, redactor ed archivar tier RTR, ha presentau a numerus hosps da quella sera, la plattafuorma *nossaistorgia.ch* e mussau fotografias veglias e films historics dalla region. A caschun dil BiblioWeekend dils 25 da mars 2023 ha Damian Berther, in giuven sportist a vela, presentau ad in intressau publicum, siu sport preferiu il navigar. Ils 25 d'october 2023 ei igl autur Guido Tomaschett staus hosp en biblioteca. El ha prelegiu ord siu roman « Cavardiras ». Tier quellas occurrenzas porscha la biblioteca adina in pign apero – ina caschun da s' entupar e discussiunar cun referents e hosps.

Per la promoziun da leger gioga la biblioteca ina zun impurtonta rolla. Aschia ei la purschida dalla biblioteca pils affons era egl onn 2023 stada multifara. Entschiet cun il « Buchstart » pils pli pigns cun lur geniturs (4 ga ad onn), cuntinuau dil zun schazegiau kino da cudisch da maletgs, Mats la miur, pils affons che san gia tedlar tier bein (7 ga ad onn), tochen tiel kino da cudisch da maletgs per il MuPi. Bein frequentaus ei era il program pils affons da scola staus, sco p.ex. leger avon il tgaun, prelecziun digl autur Boni Koller ed el november la viseta annuala dil Casparet per la scoletta ed 1. classa primara. Ina speciala occurrenza ei stada il di dallas portas aviartas, ils 6 da settember 2023, en collaboraziun cun la ludoteca. Igl atun han las introducciuns dallas classes da scola giu liug en biblioteca. Duront igl onn da scola viseta la magistraglia cun sias classes regularmein la biblioteca per empristar ora cudischs. In grond plascher per il team ed ils visitaders dalla biblioteca ei staus la bellezza decoraziun da Pastgas, messa a disposiziun da Nicoletta Marino e ses scholars/as da Tujetsch.

Uonn ha ei dau entginas midadas ella cumissiun dalla biblioteca. La geraua Iris Lombris e Simona Simonet representan vinavon la vischnaunca da Mustér. La nova menadra da scola Marina Cavelti-Mathiuert remplazza igl anteriur meinascola Roger Tuor ella cumissiun. La vischnaunca da Tujetsch vegn rappresentada da Lea Berther e la vischnaunca da Medel da Victoria Flepp-Schmed. Il team dalla biblioteca informescha regularmein la cumissiun dalla biblioteca, e s'inscuntra minimum ina gada ad onn cun ella.

Fin zercladur ha Susanna Venzin bandunau il team dalla biblioteca. Duront 10 onns ha ella luvrau cun grond engaschi per la biblioteca. Tuttas collegas deploreschan sia demissiun, engrazian denton ad ella da tut cor per la liunga ed emperneivla collaboraziun.

In special engrazia fetg va allas vischnauncas purtadras per lur sustegn finanziel dalla biblioteca e naturalmein era a nossa fideivla clientella.